

Presidente di MAMBO Audrey Croes Lacle

Mester test e dos tram nan si nan ta funciona prome cu bay na cumpra un di tres y cuater tram

ORANJESTAD – Na luga di sigui amplia e proyecto di tram, Gobierno mester mantene esaki na solamente dos y wak con e ta funciona, prome cu bay over na un di tres tram”, asina Presidente di MAMBO Sra. Audrey Croes Lacle a bisa.

Laga prome wak con esaki nan ta funciona prome cu hinca Aruba den un gasto cu e cartera no por permiti. Ya caba Aruba ta pasa di su presupuesto.

SUBESTIMA

E proyecto aki a sali asina caro, door cu hopi hende a subestima e trabounan y cu no tabata tin e hende cu e experiencia pa traha riba loke tabata warda nos. Como comerciante cu si caya a keda den e situacion cu e tabata, Caya Grandi lo a bay atras drasticamente. Caya tabata hopi deteriora y no por a sigui den

e estado ey y wanta e competencia cu a tuma luga banda di hotel. Awendia cada distrito tin nan mesun ‘mall’ igual cu paisnan grandi, lubidando con chikito Aruba ta.

TERMINO LARGO

Riba un termino largo Caya Grandi mester paga pa e desarrollo nan cu a tuma luga den bario, pero mester bisa cu drechando Caya Grandi por mantene e comercio den e area aki. Loke ta positivo di tur esaki ta cu e Caya Grandi a keda den un bon estado. Hopi



turista ta haya e caya bunita y nan ta kere den e proyecto.

E comerciantenan tabata relativamente keto den nan reaccion. No ta haya hopi comentario mas manera den pasado, anto esaki ta muestra cu tur hende ta satisfecho.

DESAROYO

Awor aki mester traha riba e desarrollo aki y mester ya paga p’e. Croes a bisa cu e no ta mira otro manera cu ta bay scapa di e situacion aki di tanto debe, pero ora bo kier algo

bunita bo hipoteca ta halto mesun cos cu un cas bunita. Porta mester a pensa na cuminsamento cu mester a bay cu no un tram of tipo di ‘trolley’ riba wiel, pero e escogencia na 2010 a bay pa e proyecto aki y awor aki no tin manera pa hala atras y mester biba cum’e y paga p’e.

HENTER CAYA GRANDI

E intencion di e tram ta pa e turista pasa den henter Caya Grandi. MAMBO a bisa cu na e momento aki no ta sinti e efecto di cantidad grandi

di hende den Caya Grandi. E hendenan cu ta baha for di e tram na e momento aki ta poco, pero unabes cu e proyecto ta cla y ta den full e temporada halto di turista y di compra local, poco poco e proyecto ta bay haya bida. Claro cu mientrastanto cu esaki ta bay tuma luga, varios negoshi ta bay sufri.

CONTRIBUCION

Croes-Lacle a bisa cu mundo comercial tambe mester bay duna su contribucion den e proceso aki. Caya tabata den

un situacion hopi deplorable y mester haci algo. Ainda tin hopi cos pa drecha y tin hopi molester di e holo di rioolering y ta spera cu tur esakinan keda soluciona den e temponan dilanti. Mester accentua si cu e manera cu e caya tabata, no tabata e miho manera pa e caya a keda aden.

REDUCI GASTO

Pues MAMBO ta satisfecho cu e mehoracion di Caya Grandi, pero ta kere cu Gobierno mester reduci e gastonan awor si un poco. □